



UKA2023/7
Oktobarip 27-at 2023
Asii Chemnutz Narup

2024-mut Aningaasanut Inatsisissatut Siunnersuut (Aningaasaqarnermut Naalakkersuisoq)

Oqaaseqaat **Qulequtaq: Aaqqissuusseqqinnerit Siunissamut**

Septembarip 26-ani Aningaasanut Inatsisissatut Siunnersuut siullermeerlugu Inatsisartuni oqallisigaarput.

Taamanikkut Inuit Ataqatigiinnit oqaaseqaaterput qulequtaqartipparput: **Aaqqissuusseqqinnerit Siunissamut**

Maanna sapaatit akunneri 4 affarlu qaangiusimalerput.

Inuit Ataqatigiinnit erseqqissassavarput aappaagussamut aningaasanut inatsisissamut aaqqissuusseqqinnerit piviusunngortinneqarsinnaanissaat qitiutillugit suleqataassagatta. Taamaammat qulequtaq attallugu, aaqqissuusseqqinnissanut anguniakkat aanngartinnaveersaarlugit suleqataanerput nangissavarput.

Inuit Ataqatigiinni aningaasanut inatsisissaq pillugu eqqarsaativut isummersornivut naliliinivullu aaqqissuusseqqinnissanut sammilluinnarput.

Aningaasaqarneq imminut napatittoq pisortallu ingerlatsiviat siunissamut isumannaagaq imminnik pilernaviangillat. Taamaattoqarnissaanut aaqqissuusseqqinnissat pisariaqarput. Taakku aningaasaqarnitsinnik patajaassutsitsinnillu nukittorsaassapput.

Taamaammanuna Attassiinnarnissamut Siuariartornissamullu pilersaarut 2-mik ujartuinerput oqaatigijuaaripput.

Ullumikkut aalajangiiffigisassat tassaapput Naalakkersuisut allannguutissatut siunnersuutaat.

Sapaatip akunnera ataaseq qaangiuppoq taakku Aningaasaqarnermut Ataatsimiititaliamut apuunneqarmata. Katillugit 59-jusut, 7 oqaasertaliussanut tunngasut, 52-llu kontonut pingaarnernut aalajangersimasunut tunngallutik.

Aningaasaqarnermut Naalakkersuisumut Naalakkersuisunullu qujanaq.

Naalakkersuisut allannguutissatut siunnersuutaasa amerlanerpaartaat Aningaasaqarnermut ataatsimiititaliap isumaqatigiittup akuereqqullugit Inatsisartunut inassutigai.

Taamaattorli allannguutissatut siunnersuutit 6 isummerfiginissaat pingajussaaneerinninnissamut ataatsimiititaliap kinguartippai - aalajangiiffigitinnagit Naalakkersuisunut paasiniagassaqarmat.

Inuit Ataqatigiinni nuannaarutigaarput ataatsimiititaliami ilaasortat tamatta isumaqatigiilluta isumaliutissiissut atsioratsigu.

Qujanaq ataatsimiititaliami ilaasortaqaatitsinnut tamanut – matumani allorassaaqatigiilluta suleqatigiissimanitsinnut.

Naalakkersuisut allannguutissatut siunnersuutaat arlaqartut oqaaseqarfiginngitsoorumangilagut:

Siulliullugu oqaaseqarfigisassarput tassaavoq
Aallarteqqinnissamut tapiissuteqartarneq (allannguutissatut
siunnersuut nr. 18 konto pingaarneq 51.01.04).

Pitsaasuusoraarput akuersaarnaartuutillugulu kontomit
tassanga aningaasaliissutinik nuussilluni tunumi aalisarnikkut
inerisaanissamut aningaasaliissutit
amerliallatsinneqassammata.

Aningaasaliissutilli ilanngarneqarnerat
isumaliuutigeqqissaagaanersoq apeqqusilaarparput.
Pissutigalugu ippassaaninnguaq Inatsisartut aalajangermata
piniartut aalisartut savaatillillu siunissami silap pissusaata
allanngoriartorneranik pissuteqartumik ajunaarnersuartut
ittumik nalaanneqarpata ikiorserneqartarsinnaasalissasut.

Naalackersuisullu konto taannarpiaq atorlugu siunertamut
tassunga suliniuteqassallutik neriorsuipput.

Aningaasaartuutaanerusussat eqqarsaatigalugit Erninermi
Aningaasaateqarfik pillugu (allannguutissatut siunnersuut nr.
34, konto pingaarneq 31.03.35) apuussassaqaarpugut.

Aningaasaqarnermut Ataatsimiititalip isummerfiginissaa
pingajussaanerinninnissamut kinguartippaa. Tamatumunnga
pissutaavoq Erninermi Aningaasaaateqarfiup siulersuisuisa
qanittukkut allagaqarlutik ilaatigut siunnersuutigimmassuk
akiliutip annerpaaffissaata qaffanneqalaarnissaa.

Inuit Ataqatigiinnit noqqaassutigaarput Aningaasaateqarfiup
siulersuisuisa siunnersuutai Naalackersiusut peqqissaartumik
inussiarnersumillu nalilersussagaat, qilanaarissavarpullu
pingajussaaneerinninnissamut nalilersueqataanissatsinnut.
Meerartaarnermi angajoqqaanngorlaat pitsaasumik
atugassaqaartinnissaat inuiaqatigiittut pisussaffiuvoq akimasooq.

Aningaasartuutaannginnerusussat ilaannut qisuariaaterput apuutilaarussupparput:

Atuarneqarsinnaasutut kontomi pingaarnermi 20.11.51-mi 35 mio koruunit sipaarutaasussanngortinneqarput (takuuk allannguutissatut siunnersuut nr. 41). Tunngavilersuullu issuassavara *"akileraartarnerup aqqqissuuteqqinneqarnera kinguaattooqqavoq, taamaattumik tamatumunnga 2024-mi aningaasanik immikkoortitisoqartariaqanngilaq"*.

Akileraartarnermik politikki aqqutigalugu naligiinnerusumik agguasseqqittarnissamut aqqutissiueqataaniarluta isumaqatiginninniarnernut upernaap ingerlanerani Inuit Ataqtigiinnit peqataavugut.

Akileraartarnermut politikki naapertuilluarnerusoq anguniarlugu oqaloqatigiinnerit sukumiisut ilumoorussisullu peqataaffigaagut. Innuttaasut akornanni aningaasatigut naligiinnginnerujussuarmik atugassaqaqtitaanerak akuersaarneqarsinnaanngilaq. Aqqiissuteqarfiginissaa kinguarsaqqinneqarsinnaanngilaq.

Neriussimaqaagut ukioq naatinnagu isumaqatigiissutissaq atsiorneqarsinnaasimassasoq. Taamaammatt uissuummivugut allannguutissatut siunnersuut manna apuunneqarmat.

Taamaattorli ippassaq Aningaasaqarnermut Naalakkersuisup sisamanngorpamut aggersaalluni allagarsitimmatigut isumallualaalerpugut. Naalakkersuisoq aggersaavoq akileraartarnermik aqqqissuusseqqinnissamut oqaloqatigiinnerit nanginniarlugit.

Aningaasaqarnermut Naalakkersuisoq aggersaanerminut anguniagai tusarusunnarput.

Aningaasanut inatsisissaq siullermeerlugu maani oqallisigigatsigu paatsoorneqarsinnaanngitsumik Inuit Ataqtigiinnit nalunaarpugut peqqinnissaqarfiup

makiteqqinnissaanut aaqqissuuteqqinnissaanut ullutsinnullu
naleqqunnerusumik ineriartortinnissaanut
aningaasaliissutissanik amerlanernik ujarlernissaq
tamaviaarukkipput.

Suliassa qarfinni allani sipaaruteqarniarnerinnakkut tamanna
iluatsissinnaasorinngilarput, naak sipaarfiusinnaasunik
allisitsiuserluta misissuigaluarluta.

Naliliinerput suli taannaavoq: peqqinnissa qarfiup
sorpasuartigut aningaasaliiffigineqarnerunissaa
avaqqukkuminaappoq.

Peqqinnissaq pillugu Isumalioqatigiissitap innersuussutaasa,
politikkikkut nalilersoqqissaariarlugit, ukiuni aggersuni
piviusunngortissallugit pisussaaffeqarpugut.

Peqqissutsimut Naalakkersuisumut qujavugut
Peqqinnissa qarfirmik aaqqissuusseqqinnissaq pillugu partinik
sapaatiuppamut aggersaaneranut.

Isertussanngilarput aningaasaliissutissanik amerlanernik
nassaarniarneq oqitsuinnaanngeqimmat.

Tunniutiinnarusunngilagut, periarfissaasinnaasut
eqqaasinnaasagut misissorpagut, misissorusullugillu.

Eqqaaneqarsinnaasut ilagaat Sanaartornermut
Iluarsartuusseqqinnissamut Aningaasaateqarfik. Ilaannimi
sanaartugassat naatsorsuutigisamit akikinnerullutik
naammassisarmata, aningaasanut inatsisissap
pingajussaaniinnginnerani tassannga
isumalluuteqaratarsinnaaneq paasiniagassat ilagissavaat.

Uunga killinnitsinni pissutsit nalornisitsisut –
pingajussaanerinninnissatsinnut iternga tikillugu
Naalakkersuisunit paasissutissiisutiginartariaqartutut Inuit
Ataqatigiit isumaqarfigisai makkuupput:

1)Uuliamut dieselimullu akit pillugit isumaqatigiissutissaq nutaaq, 2024-mut atuuttussa.

2)Aappagu raajartassat pillugit Naalakkersuisut aalajangerumaarnerat, nunattalu aningaasaqarneranut kingunerisassaa?

3)Akit qaffakkiartornissaannut naatsorsuinerit kingullerpaat?

4)Attassiinnarnissamut siuariartornissamullu pilersaarut 2'p killiffia?

5)Aaqqissuusseqqinnissamut siunnerfiit sisamat politikkikkut sammillugillu aalajangersaaffiginissaat qaqugu pissappat?

Tamakkuupput Inuit Ataqatigiinni paasisaqarfiginerunissaat iliuuseqarfiginissaallu nukinginnartutut isigisavut. Taakku siunissami atugaarissaarnissatsinnik qulakkeerinnillutillu politikkikkut iliuuseqarsinnaassutitsinnik qulakkeerinnissammata.

Oqallilluarisatoq.

Aningaasanut inatsisissap pingajussaaneerreqarnissaanut Aningaasaqarnermut Ataatsimiititaliami suleqataanissarput qilanaaraarput.

Aningaasaqarnermut Ataatsimiititaliap inassuteqaatai akuerseqataaffigalugit taasissagataa matumuuna nalunaarutigaa.

Qujanaq.